

## **VEDTEKTER FOR HORDALAND VENSTRE 2014 >**

### **§1. FØREMÅL**

Hordaland Venstre har som føremål å arbeida aktivt for Venstre si sak i fylket, i samsvar med hovudvedtektene og programmet til Venstre.

### **§2. MEDLEMSKAP**

Personar over 15 år som ikkje er medlem i noko anna parti, og som deler Venstre sitt grunnsyn, kan verta medlem i Venstre. Medlemskapen gjeld frå det tidspunktet ein melder seg inn. Medlemsrettar får ein når kontingenten er betalt.

Medlemskap, og dei rettar medlemskap gjev, gjeld berre i eitt lokallag.

Den einskilde medlem kan sjølv velja kva lokallag den vil vera medlem i.

Medlemskapen er personleg, og medlemsrettar kan ikkje overførast til andre.

Venstrefolk som bur i kommunar utan Venstrelag, kan vera direkte medlemmer av fylkeslaget.

### **§3. ORGANISASJON**

Hordaland Venstre er samansett av Venstre sine lokallag i fylket.

Fylkesårsmøtet og fylkesstyret er dei sentrale organa i fylkesvenstrelaget. Fylkesvenstrelaget er innmeldt i Venstres Hovedorganisasjon og betalar den kontingent pr direkte medlem som landsmøtet og fylkesårsmøtet fastset.

Hordaland Venstrekvinnelag og Hordaland Unge Venstre er sjølvstendige fylkesorganisasjonar med eigne vedtekter, og dei er tilslutta fylkesvenstrelaget. Dei legg fram melding med rekneskapssamandrag frå verksemda siste år, på fylkesårsmøtet.

Begge kjønn skal som ein hovudregel, vera representert med minst 40% i fylkeslaget sine styrer, utval og komitéar. Regelen gjeld og ved val av landsmøteutsendingar og ved nominasjon.

Hordaland Venstre sine partiorgan kan ikkje instruera folkevalde som er innvalde for Hordaland Venstre utover det programmet dei er valde på. Dersom det er punkt i eit partiprogram ein folkevald ikkje kan følgja, så har den folkevalde plikt til å informera vedtaksorganet om dette.

Hordaland Venstre sine folkevalde representantar pliktar å skapa gode politiske prosessar og lytta til innspel frå eige parti.

Hordaland Venstre sine folkevalde representantar dannar i fylkestinget si eiga gruppe med gruppereglement.

Reglementet skal innehalda reglar om samarbeid med fylkeslaget, mellom anna at leiaren av fylkeslaget skal kallast inn til gruppemøta. Dei folkevalde skal leggja vekt på vedtak frå fylkesårsmøtet og fylkesstyret.

### **Røystereglar i fylkeslaget**

Møteleiaren gjer framlegg om korleis røystingane skal gå føre seg, men personval skal skje skriftleg dersom minst éin person krev det. Vedtak i andre saker enn dei som gjeld vedtektsendringar gjerast med fleirtalsvedtak.

Dersom røystetala for og mot i ei sak er like, fell framlegget.

Ved val av leiar og nestleiarar krevst over halvparten av dei avgitte røystene. Oppnår ein ikkje det ved første røysting, skal det haldast bunde omval mellom dei to som har fått flest røyster.

Dersom det er røystelikskep ved andre valomgang, vert valet avgjort ved loddtrekking.

Røystesetlar ved val skal vera påført det same antal namn som det skal veljast personar i valomgangen.

### **§ 4. FYLKESSTYRET**

Fylkesstyret leiar arbeidet i fylkesvenstrelaget mellom årsmøta, i samsvar med vedtektene og årsmøtevedtaka. Det kjem saman minst 4 gonger mellom kvart ordinært årsmøte, og elles så ofte leiaren eller minst ein tredel av fylkesstyret krev det.

Styret er vedtaksført når minst halvparten av medlemmene, av dei leiaren eller ein av nestleiarane er tilstades.

Leiaren kallar saman styret og leiar møta.

Fylkesstyret er samansett av dei årsmøtevalde medlemmene, ein representant vald av Hordaland Unge Venstre og ein representant vald av Hordaland Venstrekvinnelag.

Leiaren for Venstre si fylkestingsgruppe møter i styret utan røysterett. Det same har partiet sine stortingsrepresentantar frå Hordaland høve til.

Fylkesstyret plikter å følgje opp vedtektene og har ansvar for fylkeslaget sin økonomi, nettsider, politikkskaping, informasjonsverksemd, skulering, medlemsverving og utoverretta verksemd.

Fylkesstyret har ansvar for å stifte nye lokallag samt å følgje opp dei eksisterande lokallaga sitt arbeid. Vidare skal fylkesstyret medverka til at det vert utarbeidd lokale valprogram og at det vert stilt vallister for Venstre i alle kommunar i fylket.

Fylkesstyret skal i mellomvalsår før respektive stortings- og fylkestingsval setja i gang ein open nominasjonsprosess og sørgja for at nominasjonsmøtet vert halde innan utgangen av februar (i valåret).

Fylkesstyret skal til kvart årsmøte leggja fram melding om verksemda i fylkeslaget saman med revidert rekneskap for fylkeslaget. Årsmelding og

rekneskap skal sendast til Venstres Hovedorganisasjon seinast ein måned før Venstre sitt landsmøte tek til.

Fylkesstyret set ned dei utval som er naudsynte til å ta seg av særlege arbeidsoppgåver, som til dømes valkamputval og skuleringsutval.

Fylkesstyret skipar til minst ei fylkessamling i året og regionmøte der representantar frå fylkesstyret og lokallaga i regionen deltek.

Styret tilset den naudsynte hjelp på fylkeskontoret.

Fylkesstyret skal leggja til rettes for at framlegget til stortingsvalprogram vert drøfta i lokallaga før det vert handsama på fylkesårsmøtet.

I god tid før fylkestingsvalet skal styret nemna opp ei programnemnd som skal koma med framlegg til fylkesprogram for komande fylkestingsperiode. Programframlegget skal sendast til lokallaga til drøfting før det vert slutthandsama av fylkesårsmøtet.

Fylkesprogrammet skal vera retningsgjevande for utforminga av dei lokale valprogramma og for arbeidet til fylkestingsrepresentantane og Venstre sine medlemmer i fylkeskommunale råd og utval.

Protokollar frå forhandlingane i styret skal sendast til medlemmer og varamedlemmer i styret, til sekretariatet i Venstres Hovedorganisasjon, til dei tilslutta fylkesorganisasjonane og til leiarane i Venstre sine lokallag i fylket. Merknader til protokollen må leggjast fram seinast på neste møte.

Fylkesstyret kan nemne opp eit arbeidsutval som førebur saker til handsaming i fylkesstyret og følgjer opp vedtak fatta av fylkesstyret. Arbeidsutvalet skal ha eit klart mandat som vert vedteke av fylkesstyret. Arbeidsutvalet er samansett av leiar og to medlemmer valde av og blant fylkesstyret sine medlemmer. Protokollar frå forhandlingane i arbeidsutvalet skal sendast til medlemmene og varamedlemmene i styret. Merknader til protokollen må leggjast fram seinast på neste møte i arbeidsutvalet.

## **§ 5. FYLKESÅRSMØTET**

Fylkesårsmøtet har den høgste styringsretten innan fylkeslaget. Årsmøtet skal haldast innan utgangen av februar.

Fylkesstyret kallar inn til møtet med minst ein månads varsel.

I innkallinga vert det sett ein frist for påmelding, og for å koma med framlegg til politiske fråsegner/andre framlegg som ein ønskjer skal bli tatt opp på årsmøtet. For seint innkomne framlegg må ha 2/3 fleirtal for å verta handsama.

Saksdokument skal sendast lokallag/påmelde utsendingar minst 7 dagar før årsmøtet.

Fylkesårsmøtet skal berre handsama dei saker som er sette opp på saklista for møtet.

Ekstraordinært årsmøte vert halde når minst ein tredel av lokallaga krev det skriftleg eller når styret vedtek det. Ekstraordinært årsmøte kan berre handsama den saka eller dei sakene som står på saklista ved innkalling til møtet. Det skal kallast inn med minst 10 dagars varsel. Dei valde utsendingar til det ordinære årsmøtet er utsendingar til det ekstraordinære.

Fylkesårsmøtet er samansett av medlemmene i fylkesstyret, utsendingar valde av Venstre sine lokallag og sideorganisasjonane etter følgjande reglar:

For lokallag av Venstre:

a) antal medlemmer i lokallaga:

Inntil 25 medlemmer                    1 utsending

26-50 medlemmer                    2 utsendingar

51-100 medlemmer                    3 utsendingar

Vidare 1 utsending for kvart påbyrja 50 medlemmer

og

b) antal røyster ved siste val som er gjennomført i fylket

Inntil 150 røyster: 1 utsending

For overskytande inntil 1900 røyster: 1 utsending pr. påbyrja 250 røyster

For overskytande inntil 7900 røyster: 1 utsending pr. påbyrja 400 røyster  
vidare 1 utsending for kvar påbyrja 700 røyster

Representasjonsretten byggjer på medlemstalet pr. 31.12, og berre betalande medlemmer vert rekna med.

Delegatane valde av lokallaga må ha medlemsrettar i partiet for å kunne møta på fylkesårsmøtet.

I kommunar utan lokallag, men der det er avgitt røyster for Venstre ved valet, tek årsmøtet stilling til kven som kan representera kommunen på grunnlag av røystetal.

(Nytt 2014) Sideorganisasjonane sin representasjon vert basert på antal mogelege delegatar frå lokallaga totalt, slik at sideorganisasjonane får tilsaman 15% delegatar på toppen av desse. Desse delegatane vert fordelt etter medlemstal (antal betalande medlemmer i kvar sideorganisasjon), men slik at kvar sideorganisasjon får minimum to delegatar.

Delegatane skal ha fullmakter underskrivne av leiar og ein styremedlem i lokallaget eller leiar av sideorganisasjonen.

Venstre sine stortingsrepresentantar frå fylket og partiet sine representantar på fylkestinget og dei direkte medlemmene i fylkeslaget kan delta i forhandlingane i fylkesårsmøtet, men utan røysterett.

Fylkesårsmøtet er eit ope møte, med mindre møtet i ei sak, eller for deler av ein debatt, vedtek lukka dører.

### **Konstituering**

Under konstitueringa styrer leiaren møtet.

Møtet nemner opp:

- Møtestyrarar
- Leiar og medlemmer i ei fullmaktsnemnd som gjev innstilling til årsmøtet om godkjenning av utsendingane sine fullmakter.
- Minst ein referent som fører protokoll
- Eit teljekorps
- Redaksjonsnemnd(er)
- To personar til å skriva under protokollen

Protokollen skal vera underskriven og tilgjengeleg seinast ein månad etter fylkesårsmøtet. Endeleg godkjenning av protokollen skjer i det første fylkesstyremøtet etter fylkesårsmøtet.

### **Val**

Fylkesårsmøtet skal gjennomføra val av:

- Fylkesstyre

Det første og det tredje ordinære fylkesårsmøtet i stortingsperioden vel leiar, første og andre nestleiar, 4 styremedlemmer og 7 varamedlemmer.

Fylkesstyret tilset sekretær og rekneskapsfører.

- Revisor

Det første og tredje ordinære fylkesårsmøtet i stortingsperioden vel to personar som ikkje er medlemmer eller varamedlemmer i styret til å revidera rekneskapa til fylkeslaget dei to følgjande åra.

- Landsmøteutsendingar

Kvart fylkesårsmøte vel utsendingar og varautsendingar til Venstre sitt landsmøte i samsvar med tildelt antal.

- Nominasjonsnemnd

Det første og tredje ordinære fylkesårsmøtet vel ei nominasjonsnemnd. Styret kjem med framlegg på nominasjonsnemnd.

- Valnemnd

Det andre og fjerde ordinære fylkesårsmøtet vel leiar og fire medlemmer til ei valnemnd. Ingen av medlemmene eller varamedlemmene i fylkesstyret kan vera medlemmer eller varamedlemmer av valnemnda.

Valnemnda skal på neste fylkesårsmøte koma med framlegg til val av fylkesstyre, revisorar, informasjons- og opplæringsutval og landsmøteutsendingar. På fylkesårsmøtet året deretter skal valnemnda koma med framlegg til landsmøteutsendingar. Styret kjem med framlegg på valnemnd.

### **Andre arbeidsoppgåver**

Alle ordinære fylkesårsmøte skal:

- Handsama og røysta over styret sitt framlegg til årsmelding og rekneskap. Styret har ikkje røysterett i desse sakene. Årsmelding og rekneskap følgjer kalenderåret.
- Handsama fylkesstyret sitt framlegg til budsjett.
- Gjera vedtak om kontingent for året etter.
- Handsama organisasjonsspørsmål.
- Handsama og røysta over andre saker som er sette fram i samsvar med vedtektene.

Årsmøtet i stortingsvalår skal:

- Handsama og eventuelt fremma endringsframlegg til utkast til stortingsvalprogram.

Årsmøtet i fylkestings- og kommunestyrevalår skal:

- Handsama og vedta eit valprogram for Hordaland Venstre i samband med fylkestingsvalet.

Årsmøtet i valår skal:

- Vedta ein plan for valarbeidet i fylket.

## **§ 6. NOMINASJON**

Nominasjonsmøter i Hordaland Venstre i førekant av Stortings- og fylkestingsval skal haldast innan utgangen av februar i det året valet er. Fylkesstyret kallar inn til møtet med minst ein månads varsel.

Nominasjonsmøtets samansetjing og representasjon er den same som til fylkesårsmøtet med følgjande unntak:

- Medlemmer av fylkesstyret har ikkje røysterett på nominasjonsmøtet med mindre dei er valde som utsendingar frå sine lokallag
- Sideorganisasjonane har ikkje eigne delegasjonar.

Medlemstalet vert rekna ut pr. 31.12. i året før nominasjonsmøtet vert halde, og berre betalande medlemmer tel med. Dersom nominasjonsmøtet vert halde

før årsskiftet, tas det utgangspunkt i medlemstalet pr. 1. november same år som møtet heldast.

Delegatane valde av lokallaga må ha medlemsrettar i partiet for å kunne møte på nominasjonsmøtet.

Eit medlem kan delta på nominasjonsmøte i berre eitt fylkeslag. Alle utsendingar frå lokallag skal ha fullmakter underskrivne av leiar og sekretær i lokallaget.

Nominasjonsmøtet konstituerast på same måte som fylkesårsmøtet.

Val av utsendingar skjer på lokalt medlemsmøte i den einskilde kommune. Lokalt møte vert kalla inn med 14 dagars varsel gjennom skriftleg invitasjon til alle medlemmene i lokallaget. Røysterrett på dette møtet har alle medlemmer av Venstre sitt lokallag i kommunen.

## **§7. ENDRINGAR I VEDTEKTENE**

Desse vedtektene kan berre endrast av fylkesårsmøtet når minst to tredelar røystar for det. Framlegg til vedtektsendringar skal på førehand leggjast fram for fylkesstyret og sendast ut seinast innan ein månad før fylkesårsmøtet til dei tilslutta organisasjonane og Venstre sine lokallag i fylket. Før endringane trer i kraft må dei vera godkjende av Venstre sitt sentralstyre. Eit eventuelt avslag på godkjenning i sentralstyret kan ankast til landsstyret.

*Sist endra på årsmøtet 08.02.14*